



STadthouder Cancelaer ende Raeden van syne Majesteit inden Vorstendom Gelre &c. verordent, Doen te weten, alsoomen bevindt dat nietteghenstaende by de Reformatie vande rechten ende costuymen deses Overquartiers expres verclaert, ende ghestatueert is, dat gheen recht meer soude ghedaen worden op certificaten, oft attestatien van ghetuyghen, ten sye dat deselve ten versuecke vande Gherichten daer voor partyen dingh plichtich syn, gheproduceert, oft by 't selve ghericht afgheleydt ende verhoort syn, hoe langer hoe meer daer teghens gecontravenieert wort, niet alleen tot groote onnutte costen van partyen, maer oock met peryckel van meyneedicheyt ende subornatie, behalven dat daer duer den thoon van partyen, gepubliceert wordt, eer ende alvorens de sake daer toe is ghedisponneert, SOO IST, dat hier mede aen alle Scholtiffen, Voochden ende Gerichtschryvers belast wordt, gheene dieghelycke extrajudiciele attestatien meer 't ontfanghen, ende die Schepenen verboden daer over te staen oft daer op recht te doen, op pene niet alleen van nulliteyt, maer oock van een pondt groot voor elcke acte oft contschapten laste vande Schepenen die daer over sullen ghestaen hebben, ende van dobbel int regard vande Scholtiffen, Voochden, ende Gerichtschryvers daer aen contravenierende, dan sullen hun preciselyck reguleren naer de dispositie vande stad ende landtrechten pag. 327. art. 17. 18. 19. & sequentibus: Ende soo veel aengaet de Notarissen, de selve wordt insghelyckx geinterdiceert yemant den getuyghen eydt af te nemen, oft andere certificaten te schryven, om ende voor saecken in recht hangende, oock op pene van een pont groot voor d'eerste reyse ten opsiene van yeder acte oft contschappe, ende voor de tweede reyse dobbel, ende vorts arbitralyck gestraft te worden, ende op dat niemant hier van ignorantie en pretendere, soo wordt alle Drossaerden, Amptluyden, Voochden, ende Scholtiffen geordonneert hier af publicatie te doen, oock by affixie van billetten ter plaetse daer dat behoort. ende anders ghebruyckelyck is. Gegeven tot Ruremonde den 23 Novembris 1654. Kerckhove *V*as gearapheert Kerckhove *v*. Onderstont. Ter ordonnantie vanden Hove. *E*nde *v*as ondertekent

N. MAEN

TOT RVREMONDE

By Caspar du Pree, boeck-drucker van den Souberainen Raet des Coninckg
in Gelderlandt.